



CBCS ta advertí pa Initial Coin Offerings

Centrale Bank van Curacao en Sint Maarten (CBCS) a nota un oumento den uso di *token* òf moneda digital ku ta basá riba e teknologia di Distributed Ledger Technology (DLT) komo medio di finansiamentu, partikularmente dor di empresanan ku ta lantando. Ta kondusí benta di e tipo di moneda aki hopi biaha usando terminologia manera Initial Coin Offering (ICO), initial token offering i semehante.

CBCS ta rekonosé e importansia i oportunitatnan ku e teknologia mensioná ta brinda. Apesar ku CBCS ke promové inovashon i adelanto teknológiko, CBCS ta rekonosé tambe ku tin riesgo evidente mará na ICO i ta asumí su responsabilidat dor di saka e advertensia aki.

Atvertensia pa invershonistanan

Un ICO ta un invershon altamente spekulativo mediante kua invershonistanan ta someté henter nan kapital invertí na peliger. Anke algun ICO ta brinda posibilidatnan legítimo di invershon pa finansiá proyekto òf empresa, mayoria ICO no ta suheto na niun lei òf por ta operando ilegalmente violando leinan eksistente loke ta lanta preokupashon pa protekshon di e invershonistanan. Tin tambe hopi kaso di froude, labamentu di plaka, engaño i manipulashon.

Hopi biaha un ICO ta un manera no regulá pa buska finansiamentu pa un empresa òf proyekto. Den mayoria kaso e búskeda di finansiamentu aki ta sosodé den un fase tempran i hopi biaha e produkto i servisionan ei no ta ni debidamente diseñá, trahá òf di tèst, te pa nan ta funshoná òf generá entrada. Esnan ku ta kuminsá un negoshi hopi biaha tambe ta apliká e método yama *crowdfunding* pa evadí e proseso riguroso i regulá pa generá kapital ku *venture capitalists* of instansianan finansiero ta eksigí. Den un ICO ta bende *token* na esnan ku for di tempran ta sostené un proyekto a kambio di plaka òf *cryptocurrency*, manera bitcoin òf ether.

Token ta diferensia hopi pa loke ta diseño i meta. Den algun kaso, un *token* ta representá un akshon den un negoshi, i nan promoshon i benta ta regulá komo tal. Den mayoria kaso, e *token* ta fungi komo un medio di pago/*cryptocurrency* òf ta keda usa di un forma funshonal ku no ta regulá, manera pago adelantá pa haña aksesu na un produkto òf servisio ku mester desaroyá ku fondonan atkerí for di e ICO.

Debí na su status hopi biaha no regulá i e karakter anónimo di e transakshonnan envolví, ta konsehá tur hende ku ta konsiderá pa invertí den *token* atraves di un ICO, pa konsiderá lo siguiente:

- Regulashon: mayoria *token* i ICO no ta regulá i bo no por hasi un apelashon riba un instansia reguladó.
- Volatilitat: tene kuenta ku e balor di un *token* por ta masha volátil i no tin manera pa interkambiá òf bende un *token*.
- Dunamentu di informashon: mayoria foyeto di informashon di ICO no ta kontené suficiente informashon. Es mas, e informashon por ta inkorekto, inadekuá òf engañoso. Pèrkurá pa bo ta disponé di tur informashon nesesario pa por tuma un bon desishon pa ku bo invershon.
- Apetit di riesgo: realisá ku un invershon den un fase inicial di un kompania nobo ta enserá un riesgo haltu i ta spekulativo; bo por permití bo mes e luho pa pèrdè henter bo invershon?

Invershonistanan mester pèrkurá pa komprendé e produkto. Ora ku bendedónan di *token* digital no trese e riesgonan bou di bo atenshon, komo konsumidó konsiente bo mester hasi esfuerso pa optené mas informashon tokante e proyekto, empresa òf invershon en kestion. En bista di e riesgonan CBCS ta urgi invershonistanan pa ta kouteloso promé disidí pa invertí den un ICO.

Atvertensia pa esnan ku ta emití ICO

Empresanan ku tin planeá pa lansa un ICO na Kòrsou i/òf Sint Maarten, mester verifiká si nan tin di kumpli ku obligashonnan legal, konsiderando ku posiblemente nan ta suheto na registrashon òf regulashon di CBCS. CBCS lo vigilá minusiosamente tur ICO ku no a registrá, pa determiná si e regulashonnan eksistente ta aplikabel.

Pa mas informashon por tuma kontakto ku señora Janilla Arias di nos departamento di Payment Oversight na number di telefòn (+599 9) 434 5711 òf via e-mail na JArias@centralbank.cw.

CENTRALE BANK VAN CURACAO EN SINT MAARTEN
Willemstad, 8 di mei 2018